

尋舊集

初月

聚散浮雲落暮邊，清輝初探只爭先。幽情不盡閒愁意，獨立中宵影秀娟。

秋月

桂魄斜侵草木凋，疏燈微映夢魂遙。憑欄獨立西風冷，欲訴衷心話一宵。

詠荷

橫塘搖蕩幾經秋，雲影天光任去留。舒卷自含君子色，一香拂盡莫須愁。

賞櫻

碾碎瓊瑤散碧空，妖嬈著意占春工。忍教雨打韶華送，人事花時一夢同。

江城子 詠水仙花

是誰閒步小樓東。水晶宮。不禁風。天然情致，清絕月明中。寂寞階庭羅襪冷，春欲晚，霧迷濛。

一翦梅 詠海棠花

富貴天姿別樣嬌。占斷韶光，不讓梅梢。飛花輕墜滿重階，小試宜春，紅袖時招。
也漸深沉也漸消。蠟照芳叢，詩字閒敲。人間元有細幽香，第一風流，再問今朝。

臨崖

縱使高危不染塵，遠山松對抱愁身。接天更有無窮碧，賣與雲間採藥人。

聽雨詩四首

其一

不意侵宵破夢驚，更愁花落待天明。此生總被癡情誤，細數幽窗點滴聲。

其二

飛紅經雨盡煙消，此是松邊亦動搖。吹斷夢魂眠未穩，當時風月已寥寥。

其三 第三句用拗

敲窗風雨亂如潮，惟賴心燈守寂寥。天也多情為春瘦，漫收殘淚濕紅蕉。

其四

晚來點滴壓芭蕉，客路如今更寂寥。隨處稀疏紅翠減，明朝風雨也瀟瀟。

校園

小徑逶迤累我身，盈階碧色擁行塵。雲深似是山前住，化作諸生筆下春。

戲題金魚茶包

未見寒江動碧虛，新鐺爐火有閑餘。小軒竟日渾無事，不輒團團只對魚。

與友人城市舞台看戲，忽憶幼時曾習數年，後棄之，因而有感 第三句用拗

是誰閒步小紅樓，舞動能成杜若洲。曾羨清聲愧新唱，漫從絲管憶前遊。

遙知舉袖雙行淚，欲繫無繩一葉舟。我有良朋堪結伴，深情不必靜中求。

聞知恩師抱恙，不寐憂有感

元知世事少清歡，長夜無聲更覺漫。十載深恩猶喜樂，一時窮計且悲歎。

常教動竹風前弱，不許傷心眼底酸。百感情懷疑是夢，當時明月苦中看。